

FINAMIRAS DAL CHANTUN GRISCHUN PER LA REPOWER SA (FINAMIRAS DA PROPRIETARI)

concludidas da la regenza ils 27 da settember 2016 (CR nr. 831)

1. SITUAZIUN DA PARTENZA

1.1 Politica d'electricitad dal chantun Grischun

Sco interpresa d'energia grischuna independenta che s'orientescha cun sias activitads sin plaun naziunal ed internaziunal presta la Repower SA ina contribuziun essenziala en l'interess da la politica d'electricitad grischuna. Ultra da quai ha ella ina impurtanza decisiva per l'economia publica, per las finanzas e per la politica regiunala dal chantun e da las vischnancas grischunas.

1.2 Relaziuns da participaziun e gruppa d'acziunaris en l'acziunariat

Dapi l'augment dal chapital che ha già lieu la stad 2016 consista l'acziunariat da la Repower SA dals quatter acziunaris principals:

- chantun Grischun	21,96 pertschient
- Ovrar electricas dal chantun Turgovia (EKZ)	28,32 pertschient
- UBS Clean Energy Infrastructure Switzerland SA (UBS CEIS)	18,88 pertschient
- Axpo Holding SA (Axpo)	12,69 pertschient

Ils ulteriurs 18,15 pertschient da las aczias èn en mauns da differents acziunaris publics.

Ils quatter acziunaris principals èn colliads cun in contract d'obligaziuns per acziunaris (COA). Els vulan cuntanscher ina relaziun collegiala ed ina finamira cuminaivla per l'interpresa Repower SA. Els èn sa cunvegnids tranter auter a las suandantas basas:

- la finamira suprema che la Repower SA duai esser ina interpresa grischuna independenta, da l'economia privata, manada tenor principis da l'economia da manaschi, cun finamira da rendita e cun ils martgads centrals Svizra ed Italia;
- il princip ch'il chantun agescha en il senn da l'agen urden giuridic e da conclus legitimads democraticamain e resguarda – en il rom da la politica d'electricitad – er ils interess da las vischnancas grischunas.

1.3 Public corporate governance

Per la participaziun dal chantun a la Repower SA fixescha la regenza finamiras individualas da proprietari, per ademplir optimalmain – en il rom da sia cumpetenza – sias incumbensas e sia responsabladad en l'interess dal chantun sco in dals quatter acziunaris principals. Ella fa quai en accordanza cun ils dretgs e cun las obligaziuns tenor il contract d'obligaziuns per acziunaris da la gruppa d'acziunaris e resguarda ils dretgs da terzs acziunaris.

Correspondentamain ha la regenza l'intenziun da stgaffir premissas optimalas per il chantun e da garantir la trasparenza en chaussa, per che la Repower SA possa exister er vinavant cun success en il martgà sco interpresa grischuna integrada verticalmain cun ina impurtanza decisiva per l'economia publica, per las finanzas e per la politica regiunala dal chantun e da las vischnancas grischunas.

2. PUNCTS CENTRALS STRATEGICS E FINAMIRAS

La regenza spetga che la Repower SA realiseschia consequentamain la nova orientaziun strategica, deliberada dal cussegl d'administraziun e sustegnida dals acziunaris principals, sco ch'ella è vegnida communitgada ils 18 da december 2015 resp. ils 30 da matg 2016.

En quest connex spetga la regenza particularmain che la Repower SA

- vegnia manada tenor principals da l'economia da manaschi, saja activa cun success economic en l'economia d'energia e creeschia ina plivalur per ils proprietaris;
- procura per ina ferma basa e francaziun en il chantun Grischun e stgaffeschia premissas optimalas per laschar participar il chantun e las vischnancas grischunas a l'entira chadaina da creaziun da valor da l'economia d'energia;
- exaureschia optimalmain ils potenzials da producziun che derivan da la forza idraulica e ch'èn avant maun, tras in'utilisaziun economicamain ed ecologicamain responsabla e sustegnia uschia il provediment d'energia observond la strategia d'energia dal chantun e da la confederaziun;
- orienteschia la producziun d'electricitad dal tuttafatg tenor purtaders d'energia regenerabla ed exequeschia en moda consequenta e svelta, sco annunzia, en spezial las dischinvestiziuns da las participaziuns a l'energia nucleara;
- investeschia en la producziun d'energias regenerablas resguardond ils systems da promoziun mintgamai vertents e sustegnia uschia il provediment d'energia resguardond la strategia d'energia dal chantun e da la confederaziun;
- garantisce in provediment d'electricitad segir e competitiv en ses territori da provediment;
- garantisce ina commercialisaziun optimala da l'energia producida cun duvrar ils instruments e las pussaivladads dals martgads d'electricitad;
- rinforzia – en ils secturs producziun, commerzi e distribuziun d'electricitad – sia posiziun sin il martgà sco interpresa d'electricitad integrada verticalmain e sustegnia la diversificaziun da las ristgas;
- nizzegia consequentamain las schanzas en il sector dals servetschs, per acceder a singuls novs secturs da fatschenta cun l'intent da sviluppar vinavant cun cleras finamiras il model da fatschenta ed er per gidar a diversifitgar las ristgas.

La regenza spetga ultra da quai che la Repower SA resguardia – concernent la persistenza – en tut sias activitads l'equiliber tranter ils aspects economics, ecologics e socials e tegnia quint dals svilups giuridics e socials.

La regenza spetga la finala che la Repower SA dettia l'attenziun necessaria a sia relevanza per l'economia publica, per las finanzas e per la politica regiunala dal chantun e da las vischnancas grischunas.

3. FINAMIRAS FINANZIALAS

La regenza spetga che la Repower SA

- cuntanschia in augment da la valur da l'interpresa tras sia activitad;
- emprovia da cuntanscher per ils acziunaris ina rendita da dividendas usitada en la branscha;
- procura per ina finanziaziun stabila cun ina quota d'agen chapital solida;
- garantisce – tras in'activitad d'interpresa equilibrada – in profil da ristgas finanzialas adequat.

4. FINAMIRAS DIRECTIVAS

La regenza spetga che la Repower SA

- garantisce ed applitgeschia – sin il plaun directiv strategic – tut las cumpetenzas necessarias per definir e per far valair la strategia da l'interpresa en il senn d'in svilup persistent da l'interpresa;
- disponia – sin il plaun directiv strategic – da tut las cumpetenzas necessarias per concepir e per realisar la strategia da l'interpresa;
- respectia il princip da la libertad da votaziun da tut ils represchents dal chantun en il cussegl d'administraziun da la Repower SA;
- garantisce il tractament equal dals acziunaris en lur posiziun e concepeschia ina relaziun gista cun ils acziunaris principals en il rom da las cundiziuns usitadas da martgà e da concorrenza;
- sa cumportia envers sias collavuraturas e ses collavurats sco patruna sociala che agescha cun responsabladad.

5. VALAIVLADAD E MIDADA

En cas da basegn e tar mintga midada da la strategia da l'interpresa che sto vegnir deliberada dal cussegl d'administraziun vegnan las finamiras da proprietari examinadas da nov ed eventualmain adattadas en mintga cas ed il pli tard dentant il 3. quartal da l'onn 2020.